

# De Kwakel

De Moerebuuk

Jaorgank 45



Foto Hans Sweegers Heel

Prins Henri I  
&  
Roy

**Ich gaef uch eine goje  
raad,  
haod deze vastelaovendj  
gein maot.**

Vastelaovendj 2010



Jeugdprins Max  
Jeugdprinses Geertje



Foto Hans Sweegers Heel

**Twieë Halve meuktj  
nog geine Hieële**

# De Kwakel

## Proklamatie Prins Henri I

Beste Moeërebuuk en Moeërinne

Ich Prins Henri I, 59<sup>e</sup> prins vanne Moerebuuk  
Aodste zoon van Jan Verstappen van Harrie de loeënwirker en Dora vanne Kanteneer,  
en van Elly van Miet vanne békker en Piet vanne meister,  
gebore mèt ein ónvervalstj vastelaoveshert en opgegruutj in mien dörpke Èll.

Ich bèn eine vereinigungs man in hert en nere:

Al nege jaor trots veurzitter van 't kinjervakantiewerk, ein van mien groeëtste hobby's  
Veur de dagelikse óntspanning bèn ich secretaris van Stichting Juiste Kien  
Veur kieër per jaor mèt de spoeëketochte in 't Èller brook te vinje.

Ich bèn eine echte sportfanaat, zoeë bèn ich dèk te vinje inne kantien vanne voetbalclub,  
woeë ich mèt spanning de derdje helft oppe voot volg, en meital laat oppe aovendj nog ein naobesjouwung gaef.

Sjerpste sjötter bie de sjötterrie, woeëbie ich gein sjötterfieest laat sjete.

Ich bèn eine leefhöbber van ein good glaas beer en get stómme zeiver bie Siem of Marlies aan 't buffet,  
woeë 't meital get oet de handj löptj, en ich den oet veiligheidseuverweginge pas heives loup  
as 't weer leecht begintj te waere.

Veur mien werk mót ich veul zeivere mèt mien klantje, as verkoup-adviseur bie van Eck verdeen ich de kost.  
Vastelaovendj is mien löst en mien laeve, dae ich eder jaor as Vorst same mèt René maag belaeve.

Bestuurslid vanne carnavalsvereniging doon ich gaer, dit jaor as Prins mèt de vaer.

Dit jaor maag Vorst René ouch 't spraekwerk verzörge, en zal ich as prins de vastelaovendj vere.

Eine goje Raod zal ós daobie allebei assistere.

Al mieër den 11 jaor as artiest oppe bóntje aovendj mèt gedaon.

En mèt de groep Proem, die mich de afgelopen jaore neet allein lete staon.

Mien adjudante oetzeuke waas neet eenvoudig zoeë wie 't bleek,  
neet zoeëmer ederein pèstj dae steek.

Aod Prins Siem en aod adjudant Berend, det laag veur de handj,  
in 2000 ginge wae same veurop door 't Moeërelandj.

De aafspraak waas, dit doon we euver ein paar jaor nog 'ns,  
mer den mèt michzelf as de Prins.

Aan naeve hób ich gein gebrek, mer elf adjudanten det weurtj te gek.

Adjutant naef Pieter, de aodste en verstenjigste, det gaotj gae nog waal merke,  
zal ózze groep technisch en mentaal versterke.

Same mèt de dames, Corine, Hanneke en Sanne is de groep kómplieët.

De vastelaovendj kan beginne, 't is werkelijk vrieët.

Den kóm ich tot slot bie Roy, eine echte Pinmaeker, miene steun en toeverlaat.

Prinses kan ich hum neet numme,

en al is neet ederein 't daomèt ins, wie den ouch ..... dit is miene Prins.

### Bie de gratie vanne Raod van Elf, Groeëtvorst Jan en Vorst René, verklaor ich hiebie 't volgendje:

- \* Det de naam Èll, dees daag zal verangere in 't Moeërelandj
- \* Det de Sebastiaanstraot vanaaf noe tot aan aswoonsdig de Prinsestraot zal heite
- \* Det de Prinsestraot 't kloppendj hert van 't oetgaonslaeve zal zeen
- \* De Prinselikke wuuning dao gelaage, neet veurbie gegange weurtj zónger eine "Alaaf", wie laat 't ouch is.
- \* Det de Èllervastelaovendj de sjoeëste en gezelligste van alle vastelaovendje is
- \* Det ich dit jaor same mèt mien gevolg en 't jeugdprinsepaar veurop gaon door 't Moeërelandj
- \* Det wae det doon mèt zoeëveul meugelik live blaasmuziek van de geweldjige muzikante die Èll riek is.
- \* Det 't'r inne cafe's genóg beer is veur erderein
- \* Det wae neet aan 't werk dinke, effe gein advies of geraeken mèt moeilikke maote, mer ieëst vastelaovendj vere.

Mien ingesteldje orde zal de meiste neet verbaze, dees orde is alles ómvattendj  
euver weem ich bèn:

Ich zal regere in de "Orde van 't dörp".

Bèste Moeërebuuk en Moeërinne,

Ich wil gaer aafsloete mèt uch eine geweldjige vastelaovendj te winse en det alles ónger  
mien motto:

**Ich gaef uch eine goje raod, haod deze vastelaovendj gein maot.**

2	223145	85
3	17 27 36	62
	26 42	6574 83
4	32	57 77 84
6	16	54 66 82
19	29 39 41 53	



Kinder vakantiewerk Èll



## Waat 'ne walm!!

Truus van Koos van Nies haaj ein noe aafzuugkap gekrege en waas dao hieël gruets op. Op ein gegaeve moment dacht ze; "Ich gaon get waofels bakke, ouch óm die aafzuugkap 'ns oet te probere .." Ómdet 't al get kaojer waerdje maaddje ze de ope haard aan óm ein werm en gezellig sfeertje te kriege. Wie dae good brandje ging ze ane slaag mèt waofels bakke. Pan ónger de aafzuugkap en bakke mer. De aafzuugkap aangezatte óm de baklocht neet in 't hoes te kriege, op vol vermoge dus. Op ein gegaeve moment dinktj Truus: "Begin ich noe wazig te zeen of waat is det?" Dus mer 'ns effe nao de hoeskamer geloupe. Dao waas 't nog veul waziger! Ze zaag det de kamer en later everal alles ónger eine witgrieze rouk hóng! Die aafzuugkap wirkdje zoeë hel det de rouk vanne ope haard de sjoorstein neet hooldje en 't móst aflægge tege die geweldige noew aafzuugkap.



## Euverdosis?


Quincy Beurskens deej mèt ane KVV-waek en mocht dit jaor ouch ein euvernachting mètdoon. Hae kreeg net as alle kinjer eine groeëte zak chips mèt en Mariëlle zagt nog snel dat hae ouch ein blikske of pekske drinke mèt mocht numme. Quincy koos zich snel get oet en ging nao 't KVV. Ze deje saoves karaoke en Quincy ging hieëlemaol oet zien daak. Smörges gaaf de leiding door aan moder Mariëlle det Quincy zich zoeë good

geamuseerdj haaj mèt de karaoke. Mariëlle naam 't veur leef, mer bie 't oetpakke van zien tas, zaag ze det hae ein blikske Red Bull haaj leeggedrónke.



## Hippe tante

Noor is mèt heur drie jaor al 'n aardig dametje aan 't waere. En waat doon dametjes noe lever den shoppe? Dus Noor ging met Hanneke en Linda nao de stad. Mer ze waerdje al ein bietje meug en kreeg pien ane veutjes. "Dèt kumtj," verklaordje ze wies, "dees laarsjes zitte neet lekker, want die zeen allein mer veur de hip."



## Slecht zicht.

Marjan van Jan van Sentjens haaj eine noewe bril en mèt KVV haaj ze dae op óm de kinjer op te hole op 't veldje. Ze zaag mer weinig en ein paar moders haje det inne gate. "Marjan, waat is t'r?" waerdje d'r 'ns veurzichtig gepolstj. "Nou, ich hób eine noewe bril, mer ich kan d'r geine weeg mèt, ich zeen zoeë weinig... Mesjien hób ich Jan ziene bril op... Mer get kloptj d'r neet," waas Marjan heur verhaol. Toen ze mèt ein paar man nog 'ns good keke kwome ze tot ein geweldige óndékking. Waat bleek, ze haaj de folie nog ane binnekantj vanne bril geplektj zitte.




## Oetgebroke.

Op maandjig 19 oktöeëber waas t'r 'ne houp tamtasie inne Houtingestraot. Dao sting ein hert mèt ein groeët gewei midde oppe straot. Hae waas oetgebroke oet de wei bie Loes vanne Kaolder. Anita van Ron Deckers haaj 't gezeen en kwaam drek in actie. Familie, opa Lei, buurtleje, menieër vanne Boom, Els de poetsvrouw en nog ein paar bekindje waerdje opgetrómmeldj óm det bieëst weer in zien hok te kriege. Oppe door waerdje Siem ouch nog gebeldj en dae waas supersnel t'r plaatse. Nao veul kalle mèt det hert, en ein paar sjoëen capriole van Siem, is 't bieëst weer in zien hok geloupe. Ederein waas 't t'r euver ins det ze de juuste man d'r bie haje gehooldj. Eine dae door kappes en tabak geit as de noeëd ane man is.



## 't Stónk op Rooj kirmis.

't Is t'r gezellig drök in café de Hoop mèt Rooj kirmis. Èll is ouch in groeëte getale dao en zoeë-as gewuuenlik mót Böske (laes Jeroen Coolen) weer 'ns sjiete. Boete steit eine wc-wage mer de hieëre wc bliektj bezatte en ómdet t'r op det moment nemes oppe dames-wc is geit Böske dao mer zitte. Nao lekker gesjete te hóbbe wiltj Böske doortrèkke, mer helaas ... gein water! Naodet t'r 5 minute heet staon kloëët mèt de storbak geuftj hae 't op en geit zoeë nao boete. Shit, zuut t'r dao 'n 10 vroulje veur de wc-wage staon wachte en ze rope allemaol "doe vètlap". Gelökkig veur hum wore 't allemaol bekindje.





## Fout tonieëlstök

Vanwege eine euverval oppe friettent waerdje door de plies ein buurtónggerzeuk gehaoje. Zoeë ouch bie Jan en Carla oppe Antoniusstraot. Jan waas net wèg óm te gaon darte, wie de bel ging. Carla waas dae daag in ein geweldig humeur en dacht: "det is Jan, dae is zeker zien piele vergaete". Dus zie richting veurdeur en zagt hieël zwoel "Jaaahh? Weem is det?" 't Antjwoord ane angere kantj: "De pliesie..." Carla dacht: "det spelke speul ich mèt" en zeet: "det gluif ich neet, identificeer dich mer 'ns en staek 'm mer 'ns door de brevebös ....."!

"Mevrouw," dit is echt de plies!!! "Jao, jao, ich doon al ope" En inderdaad, dao sting geine Jan, mer (dju).. eine **echte** plies!!!



## Kwispele is neet good veur de mös

José Beurskens is ein fanatiek lid van Zij-actief, veural de doe-aovendje vindj ze sjoëen. Mèt de herfstactiviteit haje ze sjoëen gipse veugelkes gemaaktj. Die haaj ze gevèrdj en later op eine boomstrónk gezatte. Hertstikke sjoëen en José apetrots op heur kunstwerk. Det mocht ederein zeen dus 't waerdje ane veurdeur gezatte.

Waat is noe 't geval? Pascal kwaam in december trök van zien 4-maondjse stage op Curaçao. Hieël de familie blie, mer de hóngj (Sparky, weem kintj hum neet?) waas zeker 't blietst van allemaol. Hae kwispeldje d'r op los ane veurdeur, tot d'r op ein gegaeve moment mèt ziene kwispelendje stert ein van die veugelkes vanne boomstrónk aafhoudje. José zaag 't gebeure en reep hieël hel: "Help, mien mös is kepot!!!"



## Vreemdj toestèl.

May van Lowieke ging nao de Spar veur ein telefoonkaart want heur mobiel geval móst opgelaje waere. Chantal van Beurskens sting net veur de ieëste kieër achter de kassa wie May óm zo'n opwaardeerkaart vroeg. "Welke mós se höbbe?" vreugtj Chantal. Woeë-op May zeet: "Jeh, zoeë'n kaart, dich wèts waal ... óm op te waardere." "Jao, det snap ich," zeet Chantal weer, "mer welke provider höb se ..KPN? ..T-Mobile ..?" May antwoortj innegang: "mós dich det neet wete?" "Nae," zeet Chantal weer, "det liktj aan diene telefoon." "Den mót ich effe Lowie

vraoge, dae zijtj inne auto, ich bèn zoeë trök". Get later kwaam May weer blie de winkel in en zeet: "Ich weit 't, eine Nokia!!!!"



## Antjwoorde 11 versjille

1. Wanjelstek Gert
2. Spiel benkske
3. Halsopening jurk
4. Lingdje jurk
5. Bril Sjang



6. Pieler óngeraan
7. Pieler bove-aan
8. Knoup moew Sjang
9. Kraag Sjang
10. Sjoon Gert
11. Pony-lingdje



## AED cursus

In Èll is de afgelopen maondje de reanimatie- en AED cursus gegaeve. Eric Wulms gaaf deze cursus ouch en vertèldje ein sjoëen verhaol oet de praktijk. Op eine cursusaovendj haaj d'r ein Belsje vrouw d'rbie zitte. Op ein gegaeve moment weurdj door emes de vraag gestèldj of 't 112-nummer in alle Europese lenj werktj. Eric wist 't neet zeker mer numdje ein paar lenj op, woeë ónger angere ouch Belsj huurdje. Stiktj die Belsje madam heure vinger op en zeet hieël serieus: "Allei menieër, bij ons in België is da nie 112, wij hebben honderdentwaalf!!!!!"



## Wisj dj'r al .....



Det José van Klaver vriedig 4 december eine surprise-aovendj haaj in Meijel, bie familie Det ze det hieëlemaal vergaete waas



Det Jari bie 't JWE zaat en Pipa bie de sinterklaosaovendj vanne buurt



Det ze de surprises bie de euverbure haje opgeslage en det ze neet wiste of die thoes wore



Det ze nao 'n half oor toch nao Meijel koste vertrèkke en det 't eine echte surprise-aovendj is gewore



Det Leon van Toon van Aere Drees eine noewe auto haaj



Det hae dae zoeë-as 't huurdj drek heet gepoetstj



Det hae de vlegestróntj neet vanne motorkap kreeg en (nao 'ne ómweeg mèt allerlei sjoerspunkses) de motorkap opnoew heet laote spuite



Det Siem afgelopen jaor al 20 jaor De Bachelorclub haaj



Det t'r aan Corine vroeg waat t'r dao mèt aan móst



Det Corine toen zagt; "Mesjien kin se beginne mèt ein opening"



Det Ron van Miet op 'ne kaoje zunjigmiddig nao 't ieëste waas gaon kieke

Det 't ein paar minse waas opgevalle det Ron eine sjoëene jas aan haaj


Det later bleek det hae de jas van Jacqueline haaj aangedaon





## Alles ane man bringe.

Leon Mennen móst leutjes verkoupe op 't voetbalveldj en ging dao fanatiek mèt ane slaag. Leon haaj opdracht gekrege det as hae alle leutjes haaj verkocht, hae den ein noew beukske mèt leutjes kost pakke. Mer Leon waas zoeë aan 't verkoupe geslage, dat hae zelfs alle controleleutjes haaj verkocht. En wae ós mer aafvraoge woeërom wae noeëts die fruitsjaol winne!



### Trouwe supporter

Zefke vanne Slegter geit op zunjigmiddig nao 't ieëste tege Heytse kieke. Ëll heet nog alles gewónne mer noe stinge ze mèt 3-2 achter. 't Waas 'ne saje wèdstried, Zefke kós 't neet mieër aanzien en ging heives. Wie d'r ziene fiets paktje ging 't fluitje en kreeg Ëll eine penantie. Zoeë det is 3-3. Veur det Zefke thoes waas maakdje Ëll nog ein goal mer det zal hae sangerdaags waal inne gezèt gelaeze hóbbe.



Waat duit Marjon hie?

- Ze sjoowtj ein noe Prinsesse tenuke
- Ze vreugtj Prins Bart ten huwelijck
- Ze leustj ein stök oet eige werk



## Gedoons inne snieë.



De familie vanne bekker ging op skivekansie. Simone haaj kort van te veure heure erm gebroke en 't is lang óndudelik gewaestj of ze waal koste gaon, ómdet Simone neet mèt kost de berg op mèt dae gipse erm. Francien en Thijs bleve op toerbeurt bie Simone, mer Francien heurdje toch alvast skisjoon en zat ze inne skikelder van 't hotel. De derdje daag ging Francien mèt skieje en hooldje heur sjoon oet de kelder, dit ging prima. Nao weer eine daag bie Simone te zeen gebleve ging ze weer nao de kelder heur sjoon hole, mer kost ze neet vinje. "Dju, heet emes mien sjoon mètgenome. Kinne ze neet baeter oet heur döp kieke," foeterdje Francien. De rest wachdje en wachdje mer en jao, nao ein oor stóng Francien inins bove. Waat is t'r toch gebeurdj woeëj ederein wete? "Nou," zeet Francien, "dao kwaam ein Belsje vrouw de skikelder binne mèt mien sjoon. Ich hób heur dao op aangesproke, woeërom ze mien sjoon aanhaaj." "MIJN schoenen zult ge bedoelen," haaj die Belsje vrouw gezagdj. "Ik heb al twee dagen niet op mijn eigen schoenen kunnen skiën, omdat iemand anders ze had meegenomen." Jeh Francien, de volgendje kieër zelf mer get baeter oet dien döp kieke.



## Hieëpe gedraag.

Nicol van Orbon ging in Kelpen op vastelaovendj zaoterdig nao de wc. Dao waas 't erg vol wie ze binne kwaam. Mer drek zeet ze: "Ich zeen det ich ane beurt bèn" Woeë-op Carla van Peet van Sjeng vanne Bekker zeet: "Det haast dich gedacht. Dich sluuft mer achteraan." Jao Nicol, dich kinst dich neet altied wie ein hieëp gedrage.



### Baeter wete!

Ein vanne jónges van Matje en Christa haaj wörmkes. Det is vervaelendj zat veur dae jóng en óm 't neet erger te make, verzón Christa det zie ze zelf ouch haaj. "Zulle wae same nao de dokter gaon? Dae heet dao zeker waal get veur". Wie ze bie de dokter zote móst 't menke ein paar kieër flink neeste. "Ich kan waal huuere woeërom des dich nao de dokter móst," zeet ein mevrouw inne wachtkamer. "Nae huer," zeet t'r, "ich hób wörmkes en ós mam heet ze ouch!"



## Döbbel-döbbel.

De selectie ging (après-) skieje in Bottrop. Gae zultj waal wete det dit in Duitslandj liktj. Mer det meuktj neet oet, want op vandaag mós se dich altied en everal kinne legitimere... Steef en Geert ginge nateurlik mèt en ze duudje allebei heure pas inne tas van Geert, den kwaam d'r zeker niks aan. Helaas, dao kwaam waal get aan. Sterker nog, aan die hieël tas kwaam get aan, want Geert vergoot óm die tas mèt trök nao Ëll te numme. 't Advies óm te belle en te vraoge of zien tas gevónje waas, waas aan Geert neet besteedj. Hae reej de volgendje daag gewuuen trök nao Bottrop. Dao aangekómme wore de spulle neet mieër te vinje. Ein oor vraoge en zeuke haaj gein resultaat. Dus hae móst veur allebei eine noewe pas aanvraoge. Twieë waeke later beldje Thea vanne gemeindje: "Jónges uch paspoorte zeen binne." "Jao mer, die hóbbe wae toch al opgehóoldj?" "Nae," waas 't weer ane angere kantj vanne lien, "de aoj passe zeen binne, emes heet ze nao de gemeindje opgesteurdj."



1e pries euver alles  
(wisselbeker)  
en ouch

1e pries wages  
mèt 147,5 puntje.  
"Neet te filme"  
van; De Prutsers



2e pries mèt 144 puntje :  
"Wae lègge de vastelaovendj  
vast"  
van; De Zeivermötse

3e pries mèt 132,5 puntje :  
"Wae zitte op 't goje spoor"  
van; De Vervaelers

Oetsleeg Vastelaovesoptocht 2009 van CV De Moerebuuk



1e pries klein groepe  
mèt 132 puntje.  
"2 önger ein kap"  
van; 3 kieër niks



2e pries mèt 125 puntje :  
"Container gehannes"  
van; Coupe Troep

3e pries mèt 120 puntje :  
"Struke dukers"  
van; Struke Dukers



1e pries groeëte groepe  
mèt 133,5 puntje.  
"Wae kómme ... oet de kast"  
van; 7 Groeëte en 1 Piep



2e pries mèt 128 puntje : "Euveral lak aan"  
van; De Moeërehieëpe

3e pries mèt 126 puntje : "Mèt eine brandjblusser ómme nek"  
van; De Brandblussers



1e pries  
alleingangers  
mèt 130  
puntje  
"Ich zeen  
geine flicker"  
door Hub  
Willekens



2e pries mèt 123,5 puntje : "Opsjöpper"  
door Peter Willekens

3e pries mèt 122 puntje : "Ich höb de leiding"  
door Paul Winkelmolen





## Monumente fieëstje.



In 't weekend van 12 en 13 september wore de monumente daag. Dao wore eine houp minse op paad om die sjoëen aoj gebouwe te bezichtige. Det waas ouch 't geval bie de Öffelse Meule in Haler, mer den allein op zaoterdig. Toos van Jos van Meerte haaj mèt eigenieër John geregeldj det ze innegang mocht exposere mèt heur kunstwerke, same mèt ein vriendin. Ouch vónj John 't good det Toos dao op zunjig inne sjeur heure verjaordaag zoeëj vere, alles waas den toch nog sjoëen en gezellig aangeklèdj. Toos waas nateurlik in heur nopjes mèt zoeë 'n historische lokatie en óntving den ouch vol trots genuuedje familie, vrinj en kinnisse. Dao waas koffie, vlaai en fris en ederein móst 't zelf mer pakke en ein plaetske zeuke om 't op te peuzele. Paul en Ana ginge bie Betsie van Jo vanne Bekker en heur zöster Els oet Grathem ane taofel zitte. Later kwome dao Jan en Annie Vossen nog bie zitte en ze haje vlot eine houp kal en plezeer. "Paktj uch nog geröstj ein stök vlaaj mèt koffie en laot t'r mich neet mèt zitte," leep Toos euveral langs de taofels. Dus de minse van hiebove nog mer 'ns trök want 't is ónfatsoenlik om eine jaorige mèt al det lekkers te laote zitte. Óngertösse wore Thei en Mia vanne Wer mèt Els Camp ouch binnegekómme en haje zich ouch ein plaetske oetgezochtj inne buurt van die anger. Innegang ging ouch de kal euver alle taofels haer en waerdje 't

nog gezelliger. "Goh, waat heet Toos toch veul minse genuuedj," zeet Annie op ein gegaeve moment. "Wiezoeë?," zeet Betsie, "heet Toos den geholpe mèt deze monumentedaag?" "Mer nae," waas 't antjwoord, "hie oppe Öffelse Meule waas allein gister monumentedaag, Toos heet vandaag heure verjaordaag d'r aangeplektj .." De wengskes van Betsie waerdje al roeëjer as det se al wore en ouch heur zöster veuldje det t'r get neet klopdje. "Oh," zeet Betsie, "noe snap ich woeërom ze Toos ein hendje gaeve." De dames höbbe toen Toos ouch mer ein handj gegaeve en zich innegang veróntsjöldjigd. Bie Thei, Mia en Els waas óngertösse ouch 't kwartje gevalle. Ouch dit grupke kreeg pienlik inne gate det 't neet om eine monumentedaag ging en paktje zich mer gauw bie-ein en ginge. Jaomer veur die gezellige minse die 't good bedoeldje, mer dao waerdje aevegood nog 'ns hertelik om gelache.



Foto Hans Sweegers Heel

## Speule

Evelien Tonnaer haaj vreuger mèt de kirmis dèkker in Èll bie Siem gewirtj. Tegewoordig duit se optraejes mèt ein noew bandje det se heet. Nateurlik wil se den get bekindjer waere inne regio dus vroeg Evelien aan Siem of ze 'ne kieër mèt de kirmis live mocht kómme speule. "Speule, speule ...," zagt Siem "hie glaze kan ze kómme speule!"



## Bèste Moeëre en Moeërinne,

Waat geit de tied toch óngeluefelijk snel. Ich weit det dit ein cliché is, mer 't is waal echt waor. Ein good jaor geleje stóngze ze ane deur om te vraoge ofdet ich prins woeëj waere en noe is 't al zoeë good as veurbie. 't Feit det 't zoeë snel veurbie is gegange is nateurlik waal ein supergood teiken. 't Aafgeloupe jaor höbbe wae, en den bedoel ich neet allein prinses Marjon en ich, mer ouch mien adjudante Ruud en Paul en heur dames Joyce en Ilse, ós boeëtegewoeën good geamuseerdj. Dit feit, leef Moeëre en Moeërinne, waas neet meugelik zóngger uch, de

vastelaovendj veerders van Èll. Nateurlik inne ieëste plaats de jeugd, mèt ein fantastisch jeugdprinsepaar, Xavier en Yvette veurop. Mer ouch alle minse die in Èll de vastelaovendj ein werm hert toe drage en hie heur, op welke meneer den ouch, ein steinke aan biedrage. En minse geluifdj mich, det zeen d'r in dit sjoëen dörp, óntzettend veul. Door uch allemaol, kan veur ós 't aafgeloupe vastelaoves seizoen noeëts mieër kapot en zal de vastelaovendj, nog mieër den ieëre, ein hieël speciaal plek in ós hert innumme. Beste Moeëre en Moeërinne, wae haje 't gelök om prins en prinses te zeen in eine tied woeë-in de vastelaovendj óntzettendj laeftj in Èll. Wae hope det ouch ós opvolgers van dit gelök moge genete, mer wae gaon d'r eigelik van oet det wae dao mèt z'n alle veur gaon zörge.

Wae vere Vastelaovendj,

Aod Prins Bart II en Prinses Marjon





## Noe wae toch hie zeen.

Marlies waas in Indonesie op vekansie en ging ouch nao het eilandj Flores. Dao waas 't allein mer ermooj. Ouch 't water waas zeldjsaam mer Marlies haaj toch gaer heur haor gewasse. Tiejes 't wanjele kwaam ze langs eine kapper en dinktj "hie gaon ich nao binne". Marlies en Corrie nao binne, Paul en Hub zatte zich in ein ruumdje d'r naeve. Veur ein pötje beer, dachte ze, mer dit móst ieëst mèt 't brummerke gehoordj waere. Marlies vroeg óngertösse ane kapper of 't meugelik waas óm heur haor te wasse en op te staeke. Hieëlemaal gein probleem! Mer dae mins begost al te zweite want hae haaj nog noeëts ein blónj vrouw de haor gedaon. Marlies en Corrie móste plaats numme en effe wachte. De vrouw vanne kapper bracht koffie, loempia's en bruudjes en 't waas drek gezellig.

**Net ein  
circuspaerd**



Marleis en Corrie zachte: "as 't neet good geit mèt die haor, den hóbbe wae dit toch gatj." Want hieëlveul vertroewe waas t'r neet, de ómgaeving in besjouwing genome... Marlies waas ane beurt en de haor waerdje gewasse in ein anger ruumdje die d'r oetzaag wie eine verkestal. Mèt ein kenke waerdje de haor gespeuldj. Corrie hooldje Paul d'rbie veur de fotoreportage. Ze loge allemaal döbbel van 't lache. Toen móst dae mins die haor nog feune en opstaeke. 't Feune ging good mer 't opstaeke lökdje van geins kenj. Marlies waas 't gefrómmel meug en zagt tege dae kapper: "doot 't mer bie-ein mèt ein stiekske." Det deej d'r, 't haor recht bove op heure kop. Toen woeëj d'r nog eine sjoëne krol make ane ziekantj.... Corrie móst nao boete loupe die deej 't in heur bóks van 't lache. Later kumtj Marlies ouch nao boete en zeet: "Ich bèn net ein circuspaerd" En det waas ouch zoeë !



**Good begrepe.**

Friedes mèt de bóntje aovendj bleef de Witte vanne Sjilder hange en ging daonao nog bruudjes aete bie Thijs vanne bekker.

Op zaoterdigmörge kwaam minister Maria van der Hoeve in Èll óm de bekker te huldige. De Witte woeëj dao gaer bie zeen. Hae ging óm 10 oor nao de Prairie, bestèldje zich ein tas koffie en vroeg woeë de bekker bleef. "Nae Witte, wae kómme hie bie-ein en van hie-oet gaon wae nao de bekker veur de huldiging." Mer de Witte heel vol: "Hae kumtj neet hie haer? Nonde dju, ich kóm dao net van aaf..."

Jeh Witte, de nacht waas kort

...



**Neet bie de lès.**

'T 3<sup>e</sup> elftal van RKESV haaj in mieërt 'ne kieër sunjes eine lekkere oetwèdstried gespeuldj. Nao 't douche waerdje d'r al inne kleidkamer gezellig naogezeiverdj. Lange Johnny waas ane beurt óm de shirts te wasse. De meiste speulers wore al klaar en richting auto's geloupe, ze zoeëje inne kantien in Èll nog effe nackalle. Mer inne kleidruumdje bleef de tas mèt shirtjes staon! Dus de lèste speuler van 't 11-tal naam de tas mèt óm die aan lange Johnny te gaeve bie thoeskómst. Zoeë gezagd, zoeë gedaon en aangekómme in Èll waerdje de vol tas oet de auto gelaje en inne kantien aan Johnny gegaeve. "Johnny, dich hoofst dich neet te drökke, hie zeen de shirts óm te wasse". Johnny keek verbaasdj, hae wist toch zeker det t'r ein tas mèt shirts haaj mètgenómme, dus toch mer 'ns good gekeke. En jaowaal, hae haaj ein tas mer ... det waas de tas vanne tegestenjer !!



**Stoute uerkes.**

Amber vanne slegter haaj boekpien en ómdet 't al de zoeëveulste kieër waas det ze dao-euver klaagdje, ging Marleen mèt heur nao de dokter. De dokter kost gelökkig niks vinje en ging 'ns mèt Amber in gesprek. Hae vroeg wie 't geit op sjoëel en kwaam



d'r achter det Amber weurdj gepestj ómdet ze gein oeërbelle heet. Marleen waerdje neet good!! ... Ze waas al zoeë dèk mèt heur inne stad gewaestj óm gaetjes inne oeëre te laote make, mer det dörfjt Amber neet !!

**Oetbreijing??**


Math heet veurig jaor zien kamer verboutj zoeëdet hae mieër ruumdje kreeg. Christa haaj de vèrf al lang in hoes veur det Math klaar waas. Ze sting te popele óm te beginne want ze wist precies welke kleure ze woeëj, broen, paars en bordeaux. Wie ze eindelijk kóst beginne haaj ze ein half moor klaar mer ze vónj 't niks. Toen Carien mer gebeldj en die zeet: "Maak dit ins aaf den kins se baeter zeen wie 't weurdj". Nae, dao móst ein anger kleur kómme, hel blauw, det is sjoëen. Den kins se baeter zaocht blauw pakke, zeet Carien. Carien zörgdje veur zaocht blauw en Christa begós weer te vèrve. Ein vanne kinjer leep langs en zagt: "Kriege wae ein babytje? Zeker weer ein jungske". Christa bekeek zich det ins, det babyblauw, mer det waas niks. De kamer heet noe hieël neutrale kleure, zandkleure en beige, dao kins se dich echt geine böltj aan valle mer noe zitj Math d'r mèt ... mèt al die laoge vèrf is de kamer weer eine halve maeter kleiner gewore!

**TE KOUP:  
7 half pöt  
vèrf**



Sjan zaag eine leuke groeëte spiegel op Marktplaats.nl en deej 'n bod.

Nao get op-en-nieër beje waas 't gelöktj, de spiegel waas van heur. "Eine sjieke deal," dacht Sjan. Mer det waas veurdet ze haaj gekeke woeëdet dae spiegel vanaaf kwaam. In Antjwerpe kost ze 'm gaon hole!



## Taxi!

Miek vanne Sjilder en Thei wore mèt de auto d'r op oet gewaestj. De tank raakdje aardig leeg, dus stopdje ze bie 't tankstation. Wie ze klaor wore mèt tanke leep Miek nao binne óm te gaon betale. Óngertösse reej Thei de wage ein stökske vroet zoeëdet de volgendje klantj ane pómp kost. Miek kumtj trök nao boete staptj in... inne verkieërdje wage! "Jeh," zeet dae mins "Ich wil dich waal mèt numme, mer ich weit neet woeë des se móst zeen."




## Foute lien gepaktj.

Nao de zomervekansie ging Mike veur 't ieëst nao zien noew sjoel. Hae haaj mèt moder Connie aafgesproke det t'r mèt de bös zoeëj gaon. Connie waas t'r neet geröstj op det 't allemaol vlekkeloos ging verloupe en vónj det Mike bie de halte of op internet móst kieke wie

laet de bös ging. Dae mörge leep Mike nao de bös, hae waas nog get duf want hae waas flink op stap gewaestj. Nao ein puueske

kwaam d'r weer trök binne. Potverdikke, haaj d'r toch de bös gemistj? Nou, nae... Mike waas bie de halte gaon staon en wie de bös kwaam haaj d'r ane chauffeur gevraogtj of dit de bös nao Remunj waas. Nae, helaas, die waas net vertrokke ..... ane angere kantj vanne weeg!! Jeh Mike, die bös ane angere kantj waas waal op tied.



## Franses les veur gevorderdje:



Waat beteikentj: "11 13 heet 11 Vincent in ziene 66 gebete"

Antjwoord: "Once Treize heet Once Vincent in ziene soixante-six gebete"

Ofwaal: "Ós Trees heet ós Vincent in ziene swans-sies gebete"

## Alles bie zich?

Francien en Thijs haje heur fototoestèl kepot. Dus ze ginge d'r mèt trök nao de winkel. Alles waerdje ingepaktj: oplajer, kabels en zoeë. Later stóngje ze inne winkel in Wieërt en nao 't verhaol gedaon te hóbbe, paktje ze de doeës oet en ... alles zaat d'rin .. behalve 't toestèl !!




## De weeg kwiet.

Alweer veur de 10<sup>e</sup> kieër waerdje d'r 'n wanjeltocht georganiseerdj door de bosse en natuur rónjdóm Èll. D'r zeen den versjillendje routes oetgezatte, van versjillendje lingdjes. Mer Mario en Chantal vónje det toch nog waal get wiet veur heur jónges. Dus stèldje Mario veur óm nao 't Wieërterbos te gaon en dao get te wanjele. Den zitte we neet vast aan minimaal 8 km enne hóndj maag dao losloupe, en det geit hie neet mèt zoeëveul minse oppe bein. Hae haaj d'r neet bie naogedacht det t'r dao de weeg neet kintj, ze zeen dae middig den ouch versjrikkelik verdwaaldj.



## KOPPIEN.

Steef van Jo vanne Sjilder waas op vekansie in Salou. Nao drie daag haaj hae flink koppien, eine zónnestek. 't Waas zoeë erg det hae nao de dokter ging veur pilkes. Wie Steef ane beurt waas bie dae Spaanse dokter zeet hae: "I've got a steak in my head. "Höbtj gae oeëts gehuurdj van pilkes veur eine bief inne kop??"



## Waat noe?

Karin, winkelbedeendje bie de Bekker, kost neet inne Smart rieje. Edere kieër as ze woeëj vertrèkke sloog nao eine maeter, dae auto aaf . En ouch as ze 't weer opnoew probeerdje ... nae, dae auto sloog edere kieër aaf. Den mer goje raad gehoordj bie de bazin. Francien leep mèt nao de auto óm te kieke waat t'r aan mankeerdje. Dus Karin stardje de Smart en woeëj vroet rieje. Mer plof stil! "Jeh," zag Francien, det is neet vreemdj. Dich riedst tege ein pälke aan..."




## Waat speultj zich hie aaf?

- Western vrouw heet hónger
- Kusse mèt ein paerd is in !
- Pamela is incognito mèt de vastelaovendj
- Ein zwaor hieëpe geval



## Witj djr al ...



- o Det Siem en Corine in Egypte op vekansie ginge ómdet Vera det gaer woeëj?
- o Det t'r veul jóngere aojere wore oppe fieëstdaag vanne seniore vereining
- o Det Wiel van Toeëm ziene eige zak mó't neije?
- o Det zien Annie de hieële daag veur de computer zitj
- o Det de gemeindje 't trapveldje heet geëgaliseerdj veur de sjaatsbaan
- o Det ze det net gedaon hóbbe veur de Sinte Merte
- o Det daodoor ederein smerige sjoon kreeg
- o Det 't noe waal mó't gaon vreze
- o Det Piet van Glabbeek nao 50 jaor getrouwdj te zeen tege Mia zeet det ze de èrpel te dik sjèltj
- o Det Paul van 't kwakelcomité veurrang geuftj aan Petje Plop veur de Kwakel
- o Det zien Ana ane telefoon zeet; "Paul is bij de Ploppers."
- o Det Jeanne van Stals inne KVV-waek Roos Vicee drónk wie ze mè't de leiding ginge Grieke
- o Det Astrid Heber en Anita Timmermans dae zelfdje aovendj de hieële tied inne meis fietsdje
- o Det Steffanie Roost maondjverbandj ónger heur erm haaj oppe leedjesaovendj óm zweitplekke te veurkómme
- o Det Joyce en Marleen, twieë dames oet Èll, mètlepe mè't de veerdaagse van Nijmege
- o Det Remko mè't ein paar vrinj nao Nijmege ging óm de dames te steune
- o Det hae nogal ónger de indrök waas vanne groeëte stad
- o Det t'r meindje geldj te kinne pinne bie 'n verzekeringskantoeër
- o Det hae INGANG mer half gelaeze haaj en meindje bie de ING veur de deur te staon
- o Det Ruud van Hover reserve waas mè't voetballe
- o Det hae ein fluit huerdje en ziene jas oet deej en d'r toen achter kwaam det det fluitje van 't anger veldj waas
- o Det Mylou van Truus van Vin Lei rechte studeerdj en in heure vrieje tied appele plöktj
- o Det wie ze 'ns oppe tractor reej emes anges zagt; "Dao riedj de rijdende rechter"
- o Det t'r twieë militaire 20 oor vermistj zeen gewaestj
- o Det t'r bie Leon vanne Spar ein SMS-alert kwaam en Tiny kreeg det mè't
- o Det Tiny de oplèttendje börger waas en die jónges gemeldj heet
- o Det Marlies Crommentuyn oppe leedjesaovendj mè't Peet van Heber aan 't kalle waas
- o Det heur de rok aafzakdje mer 't waas al zoeë laat oppe aovendj det Peter niks gezeen haaj
- o Det Jurre van Anke oet bad kwaam en eine handjdoek ómme kop haaj gedreitj
- o Det hae toen zagt; "Noe bè'n ich de mamma van Idris."
- o Det Nicole, dochter van Geer en Anny, haaj gehuerdj det Frank van Kouwen (speuler van VVV) nao Èll zoeëj kómme
- o Det dae Frank op 2 januari veur de start vanne voetbalplaetjes actie vanne Spar waas genuuedj
- o Det Nicole dacht det dae Frank bie 't 1e van Èll kwaam speule
- o Det ze 't toen erg zielig veur hum vónj det hae noe geine eige sticker haaj veur inne voetbalalbum


## Waat zeen wae oppe foto ???

De prins ging mè't de Raod van Elf ein groepsfoto make. Dit deje ze oppe boorderie bie Hover. 't Idee waas óm d'r ouch ein kääfke op te zètte, det geuftj ein sjoen plaetje. 't Kaof waas 't dao neet mè't ins en zat 't op ein loupe. Prins Bart woeëj d'r achteraan, mer haaj vergaete det t'r zien sunjese sjoon aanhaaj in plaats vanne stevele. Hae sjuutj oet en liktj mè't zien good pak lankoet oppe gróndj.

't Zelfdje verhaol as 't hiebove, mer mè't dit versjil det de fotograaf neet klaor stóng en de foto neet sjerp waas. Daezelfdje daag nog zeen Jan Verstappe en de prins trökgeganse nao de boorderie. Dao hooldje ze 't kääfke weer oet de box en hóbbe ze de situatie naogespeultj. Dit hóbbe ze ettelikke kieëre oppernoet mótte doon veur dit resultaat.







## Ein fieëst.


Eder jaor organizeerdj 't Fieëst Aovendj Comité (FAC) ein fieëst veur de minse die mètgeholpe hóbbe ane Èller vastelaovendj van 't aafgeloupe jaor. Deze kieër zaat ouch in de organisatie nemes minder den Prins Bart II, Prinses Marjon en de adjudante Ruud en Paul mèt heur dames Ilse en Joyce. Alles speuldje zich aaf bie de Prairie en sting in 't teiken van Truckstop 'De Prairie'. De bedoeling waas det ederein zich verklaedje as trucker. Det waas nateurlik neet moeilik, eindelijk koste de meiste 'ns 'ne aovendj de boek laote hange ... De zaal waas aangeklèdj as ein echt truckerscafé en zoeë-as inmiddels traditie, waerdje aangekondigd det groeëtvorst Jan en 't prinsepaar Bart II en Marjon eder ein vaat gove. Det waerdje nateurlik gewaardeerdj mèt ein applaus enne aovendj kost al drek neet mieër kapot. Ónger 't motto "Mèt 'ne tieëntónner ónger de kóntj, make wae 't deze aovendj hieëlemaal bóntj" waerdje de aovendj in gang gezatte. Dao waerdje oetgelagd, det as truckers mèt de vrachtwage in 't boetelandj zeen, de vrouwe zich den zelf mer get mótte zeuke óm zich te amuzere. En waat doon die den? Juust, de vrouwe gaon den kiene. Dus waerdje d'r echte kienkaertjes rónjdgedeild door de dames Marjon, Ilse en Joyce, die zich as heuse showgirls aangeklèdj haje. Bart reep de nummerkes óm en al snel veel hie en dao 'de juiste kien'. Of det altied aeve ieërlík ging laote wae in 't midde. Belangrieker waas des se d'r fantastische priesze mèt kost winne. Get later wore alle priesze verdeild en stóng alweer 't volgendje puntj op 't programma. De organisatie haaj nemes minder as duo Vol Drin oetgenuuedj óm 't publiek te gaon vermake mèt schlagers en angere muziek woeë se op mèt kinst galdere. Det deje ze good en veurdet ederein 't inne gate haaj waas 't tied óm de innerlikke mins get gaon te versterke.



Dao waerdje echt truckers-aete op taofel gezatte zoeë-as mega-gehaktjöl, frikandelle en anger gezóndj lekkers. Det ging d'r in as paeperkook kintj gae waal begriep. Mèt de boek vol koste de meiste d'r weer 'n puueske tege-aan. 't Waerdje snel laat en 't bleef nog lang eine gezellige boel. Mer jeh, det zeen wae gewindj van truckers óngerein. Op nao 't volgendje fieëst ... zeetj gae d'r den ouch bie?



## Wisj dj'r al ...



- Det Rens en Marleen nao 't tankstation reje óm de autobenj op spanning te bringe
- Det dao de compressor kepot waas woeëdoor de bandj leeg leep
- Det ze toen 't reservewiel d'rop hóbbe mótte lègge
- Det dames 1 van 't volleye zich bie Siem verzamele en dao ouch weer trök kómme as se 'ne wedstrijd hóbbe
- Det Maartje nao de wedstrijd in Mestrecht vroeg of de chauffeur dit kieër euver Kelpen trök kost rieje, want zie móst hieëlemaal bie de Prairie zeen
- Det ze toen tösse Grathem en Kelpen 25 minute inne file stinge



## CV De Moerebuuk



### Programma Vastelaovendj 2010

Sjriefjt dit mer alvast oppe klender.

Veur wie laat en zoeë mójt gae 't Kontaktblad, etc. inne gate hajoje.

Aaf en toe 'ns kieke op <http://www.ellonline.nl/moerebuuk/> kan ouch gein kwaod.

Zaoterdig	16 jan : Receptie noewe Prins Moerebuuk
Dinsdig	19 jan : Oefene Bóntje Aovendj
Dónderdig	21 jan : Oefene Bóntje Aovendj
Zunjig	24 jan : Kaartverkoop Bóntje Aovendj
Maondjig	25 jan : Oefene Bóntje Aovendj
Dinsdig	26 jan : Oefene Bóntje Aovendj
Dónderdig	28 jan : Generale repetitie Bóntje Aovendj
Vriedig	29 jan : Bóntje Aovendj
Zaoterdig	30 jan : Bóntje Aovendj
Zunjig	31 jan : Senioremiddig
Vriedig	5 feb : 80+ middig Bachelorclub
Dónderdig	11 feb : Sleuteleuverdracht jeugd
Vriedig	12 feb : Sjoëelcarnaval
Vriedig	12 feb : Sleuteleuverdracht
Zaoterdig	13 feb : Optochtnummers aafhole Bachelorclub
Zunjig	14 feb : Vastelaovesmès
Zunjig	14 feb : Vastelaovendj zunig mèt chipsbal en aovendjactiviteit
Maondjig	15 feb : Vastelaovendj maondjig = OPTOCHT en priesoetrekking
Dinsdig	16 feb : Vastelaovendj dinsdig = KINJEROPTOCHT en ... sloete !



## Drie kieër is sjeepsrecht



Zoeë-as 't spraekwoord al zeet zoeë euverkwaam 't Thieu en Claar ouch. Op zunig 19 December ginge ze al hieël vreug mèt de trein nao Deventer want dao waas 't hieël centrum verangertj in Charles Dickens sfeer. Mer door 't slecht waer ging de trein neet verder as Indjrove en wore ze óm 10 oor al weer trök in Èll. Nog gein waek later (twieëdje kerstdaag) probeerdje ze 't opnoew, mer noe neet zoeëwiet want noe ginge ze nao de Eynderhoof. Dao waas 't opelocht museum ouch ómgetoverdj mèt Charles Dickens figure en optraejes. Nao ieëst 'ns 'n half oor bezig te zeen gewaestj óm de auto kwiet te waere, kwome ze in ein kilomaeterlang rie te staon, en dao haje ze ouch gein zin in. Dus toen weer heives en sangerdaags mer opnoew geprobeerdj. En gelökkig waas de rie toen mer half zoeë lank. Doe móst 'r get veur euver hóbbe óm get te kinne zeen!



## Zeuk de 11 versjille !!



Oplossinge örges anges in deze Kwakel

### Help, miene mins is klusser...

Op eine zaoterdigmörge vroeg Jan aan buurman Henk of hae 'ns nao ziene auto woeëj kieke, want d'r mankeerdje get aan. "Is good," zeet Henk, "waat zeen eigelik de probleme?" "Jeh," zeet Jan, "ich geluif det aan 't rechse veurraad get neet good is, want dao kumtj aaf en toe ein fluitentj geluid vanaaf." "Krik de auto mer op," zeet Henk, "den hole wae 't raad d'r vanaaf zoeëdet wae alles kinne naokieke." Mer Henk kost niks verkieërdjs vinje. "Den 't raad mer weer d'rop en wae kieke veur de zekerheid ouch nog effe ane linkse kantj." Mer ouch ane linkse kantj waas alles good. "Den gaon wae mer ein stökse rieje," stéldje Henk veur. Ze reje de straot oet en effe daonao zeet Jan tege Henk: "Loester, noe huuer ich 't weer!" "Kloptj," zeet Henk, "ich huuer 't ouch." Effe later vreugtj Henk aan Jan: "En noe den?" "Noe is 't wèg. Wie kan det?" "Jeh," zeet Henk, de raam stóng nog ein bietje ope, dae hób ich net toegedreitj!"



### Nemes niks gemerktj.

Steffanie Roost kwaam trök van 't op stap gaon en ze haaj get hónger dus smeerdje ze zich ein lekker bruedje. Ze woeëj det gaer bove op heur slaopkamer opaete, zoeëdet ze innegang heure make-up van heur gezicht kost hole. Ze leep oppe tast nao bove, want as se 't leecht aan zoeëj doon, waerdje ederein in hoes wakker. Normaal kan ze de weeg in 't dónker good vinje, mer noe leep ze p'r óngelök toch tege ein moor op en ... knoets ... de telder mèt 't bruedje veel oppe gróndj! D'n telder kepot en 't bruedje euver de vloer. Shit! Den mer weer in 't dónkel trök nao ónger gesjraeldj. Ze hooldje de stofzuiger óm de sjerne en troep op te zuige. Mer 't waas tamelijk dónkel, dus ze zat de stofzuiger aan en gebroekdje 't leecht van heure mobiel óm te zeen woeë ze zuige móst. Mèt zoeë weinig leecht waerdje zeker nemes wakker....



### Weurdje vanne redaktie

Veurig jaor haje wae 'n jubileumoetgaaf en meestal is det de aanleiding óm 't jaor d'rop te beginne mèt get noets woeë se weer 11 jaor mèt verder geist. Mer det höbbe wae neet gedaon! Oet eur reakties bliektj det De Kwakel herstikke sjoëen is, dus woeërom zoeëje wae den hieël get anges gaon verzinne? Waat good is mós se good haoje! Allein mèt de adverteerders zeen wae, in euverlèk mèt 't bestuur, get anges ómgegange. Det heet puur te make mèt plaats make veur eur verhäölkes, want steeds mieër minse levere aan via de site vanne Moerebuuk, woeëveur trouwes ózze dank. Verder is alles óngevieër bie 't aoje gebleve, gae mójtj allein effe wete det Nicol ós team is kómme versterke. En 't zal uch mesjen opgevalle zeen det Ellske nao de sjoëenheidsspecialiste is gewaestj ómdet die tang det nuuedig vónj....!

De Kwakel is ein oetgave van 't Kwakelcomité; Jeanny vanne Kaolder, Corry van Pleunis, Hub vanne Baars, Rianne Goldenbeld, Nicol Orbon en Paul van Miet

Mèt dank aan; Tjeu van Lemme



### MANNE OF VROUWE ZITTING?

Veurig jaor ginge ein aantal dames veur heur jaorliks oetstepke wanjele en de wanjeling ging door Neeritter. Ze haje dao eine koffiestop geplendj, mer tot heur verbazing wore alle kroege die ze woeëje aangaon toe. We probeer d'r nog ein, anges höbbe wae pech gadj dachte ze. Toen nao De Put, die waas ope. Hie waas mannezitting en kwome ze d'r neet in. Mer vlak de dames neet oet, 't raengeldje det 't zeikdje en ze kaldje zoeë lang det ze zich ein teske koffie mochte drinke. Dit tot óngenoege van ein aantal manne, die haje oeteindelik mótte betale veur deze middig. Angere vónje 't waal kinne. De prins vónj det ouch waal ein sjoëen aafwisseling en reep de dames nao 't podium. Ze waerdje zelfs door hum óngersjeije! De dames stónge toch 'n bietje óngemaekelik toen ein paar manne begóste te zinge "wae wille tiete zeen, wae ..." De dames höbbe d'r nog ein paar gedronke en zeen toen toch mer verder gewanjeldj.





## Sponzergeldj doorsjuve.

KVW kreeg veurig jaor 'n sponzering van Ellside (vriemertj) van 300 euro. Dao wore ze hieël erg blie mèt want ze zote krap bie kas en 't waas 'n jubileumjaor. Noe koste ze get extra's doon veur de kinjer. Ouch vroege ze tiejes de kinjervekansiewaek of de tente veur de euvernachting gesponzerdj koste waere. Vervolges weurdj d'r via de dörpsraad 'ne AED wirkgroep opgericht. Die ginge rónjdj door Èll óm geldj in te zamele veur de aansjaf van defibrilatore. En raad 'ns waat, KVW waerdje inins eine gulle gaever. Ze sjónke zoeëmer 500 euro aan de AED wirkgroep. Dit is toch 'ne vreemdje gang van zake. Ellske dacht toch zeker det KVW 't geldj waat ze inne kas kriege ane kinjer mótte besteje. 'T bestuur heet as argumentatie det ze vinje det de Èller bevolking zoeëveul veur 't KVW duit, det ze ouch waal 'ns get trök kinne doon. Of zoeëj 't missjien zoeë zeen det ein vanne bestuursleje zien geheime bankraekening in 't boetelandj mèt haost leeg heet gehoordj en snel geldj kwiet móst?



De moeër van Ellske



## Èll steit oppe kop.

Waas 't uch ouch opgevalle det 't bord "Eil" bie de Prairie tege-euver ein aantal maondje oppe kop heet gehange? Ellske vreugtj zich aaf waat hievan de bedoeling is gewaestj. Zoeëj det gedaon zeen veur de gaste die bie de Prairie oppe kop nao boete kómme? Zoeëdet die toch kinne zeen det ze nog in Èll zeen. Of heet emes geprobeerdj óm Èll in 't plat te vertale.

'T kan nateurlik ouch zoeë zeen det de gemeindjewirker, dae det bord op 'ne maondjigmörge heet opgehange, zelf nog good inne olie waas vanne aovendj teveure.



*Beste bewoners,  
Jullie hebben de eer naast de prins van de Moerebuuk te wonen,  
Daarom zou u wat respect kunnen tonen.*

*Een vreemde vlag hing tussen een mooie Ellse eenheid,*

*Ja die ben je dus tijdelijk kwijt.*

*Hij komt vanzelf weer terug,*

*Maar dan is Vastenavond al achter de rug.*

*Dit alles is natuurlijk een grap,  
Verzonnen aan de tap.*



Woeërom dit gedicht in 't Hollandjs is gesjreve moge dudelik zeen, want probeer dit mer 'ns in 't Wieërts te sjrieve. Weem van dees familie die vreemdje vlag heet boete gehange wètj Ellske neet, mer as de man des huizes dit gedaon heet zal dit waal beteikene det dae mins zeker noeëts prins vanne Moerebuuk zal waere. Mer weem zal 't zègge, mesjien wiltj de vrouw des huizes waal prinses vanne Rogstaekers waere.

## Kebabtent op 't plein

Veurig jaor augustes zoeëj d'r al 'n opening plaats vinje, mer dit waerdje toen twieë waeke oetgesteldj. En edere kieër as emes vroeg nao de opening waas 't antjwoord "euvet twieë waeke". Dit doortj noeë al mieër as ein jaor. De oetbater heet blikbaar alle vergunninge bie-ein. Mer Ellske dinktj det dae man naeve de kebabtent, d'r ouch 'n koffieshop van wiltj make. Det is 'n good idee want d'r zeen óngertösse inne ómstreek zat telers van det spul te vinje. Det leustj Ellske teminste dèkzat inne gezèt.



## AED-cursus

Ellske haaj zich ouch opgegaeve veur de AED cursus en waal óm slachtoffer te speule. Dit is achteraf good tege gevalle. Ein van de cursus oefeninge waas 't reanimere. Dus flink drökke, midde oppe borstkast. Of as se neet wètst woeëdet det precies is, hóbbe ze ein ezelsbrökske, juist tösse de tepels. Nou, dao wore d'rbie die duudje mich 't hieël middigaete omhoeëg. Ein anger oefeninge waas de móndj op móndj be-ademing. En dae aom van sómige, dae waas neet te proeme, dao kwoom se van aan 't kótse. Mer van gein van al die oefeninge ging 't hert sneller kloppe. Allein det se nao eder oefeninge de móndj gewasse kreegst mèt alcohol, det vónj Ellske waal erg lekker. Oeteindelijk waas Ellske waal blie det se alle 60 cursiste gadj haaj en ederein geslaagdj waas.

## Legendaries voetbal.

'T ieeëste duit 't goot dit seizoen, ze staon sterk bove-aan. Dit heet RKESV in hieël heur bestaon nog noeëts mètgemaaktj. En Ellske wètj wie det zoeëmer heet kinne gebeure. Det liktj neet aan de 4 noew bestuursleje, 't liktj ouch neet ane trainer. Nae, woeë 't waal aan liktj is aan eine supporter en det is nemes anges as Cor v. S. Dae haaj veurig seizoen al 'ns tege de trainer gezagtj: "die jóng die loupe neet, doe móst die 'ns get gember in die kóntj duje. Det deje wae vreuger bie de paerd ouch en den mós se 'ns kieke wat die wille loupe". En det heet geholpe want ze winne noe bienao kieër op kieër.

## Euverluiper

Ellske kreeg 't aafgeloupe jaor 't volgendje gedicht inne henj.

## Ellske

Kritisch, sjerp en oplèttendj. Det is Ellske. Dees aoj tante duit op heur eige meneer

verslaag van waat ze zoeë-al hie inne buurt heet gezeen of gehuurdj.







### Laat thoes.

Wilma en Tjeu van Nies ginge nao de landjbouwbeurs in Den Bosch en dao ginge ze mèt de trein haer. D'r waas van alles te zeen en 't waas den ouch eine interessante daag gewaestj wie ze weer trök op heives aan ginge. Wie de trein stopdje in Wieërt stinge Tjeu en Wilma al bie de deur, mer... ze wiste neet wie det die ope móst. Wilma waerdje zenuwechtig en kreeg d'r pis van, die deur móst ope! Ze probeerdje vanalles, mer de deur bleef toe en de trein vertrocht alweer wiejer, richting Remunj. Dao aangekómme wiste ze óngertusse waal wie de deur ope ging. Gelökkig, want ze móste ieëst nog op zeuk nao ein wc, veurdet ze weer oppe trein trök nao Wieërt koste stappe.

Jao, kum se 'ne kieër oppe helle den kloëëtj dich ouch nog 'n treindeur en bienao d'n hoeëge noeëd.

**STOPPE !  
Ich mótt nao  
de wc!**



### Ein trap te hoeëg.

De oetnuuejiging van de fieëstaovendj vanne Moerebuuk beloofdje völ. Mèt optraeje van de showgirls: prinses Marjon en de adjudante-dames Joyce en Ilse. 't Optraeje waas ein groeëte verrassing, de gehaktból ein groeët succes en 't kiene ein groeët geknoëj mèt neutjes. Adjudant Paul en zien vriendin Joyce haje zich good geamuzeerdj en haje zich, nao eige zëgge, ouch netjes gedrage. Smörges óm half nege sting ein verwerdje Joyce bie Paul aan béd: "Heb je me niet gemist vannacht?" Paul dae nog neet good wakker waas snapdje d'r niks van. Tot Joyce vertèldje det ze wakker waas gewore wie ze heur veut stoeëdje tege de bédplank en zich gerealiseerdj haaj det ze hieëlemaal gein plank haje achter aan heur béd. Blikbaar waas ze snachs ein trap te veul opgeklómme en oppe zólder op 'n béd in slaop gevalle.



### Bèste moeërebuuk en moeërinne,

Op 't moment det ich dit sjrief wistj gae nog neet weem de noewe Prins waas. Ich wist det waal en op 't moment det wae Henri vroghe om Prins te waere, beteikendje det innegang det ich Henri zien take as Vorst op mich mocht numme. Dao hób ich gein moment aan hove te twiefele. Same haje wae de take van Groeëtvorst Jan euver genómme. (Henri names de vereniging nao boete oet en ich as veurzitter vanne Raod van 11.) Ich weit zeker det mèt zoeë eine Prins (mèt zien gezelsjap!) veurop, dit jaor wae weer eine geweldjige vastelaovend gaon belaeve. Ouch de noewe jeugdprins en jeugdprinses mèt heur adjudanten enne jeugdpraod wins ich ein geweldig vastelaovendj seizoen toe. En ich hoop det se anger jeugd en de get aojere ónger ós zoeë oppe bein kriege, det wae volgendj jaor weer kinne zëgge "Waat waas 't veurig jaor weer GEWELDJIG." Uiteraard wil ich ouch nog aodprins Bart II en prinses Marjon, adjudante Ruud en Paul mèt heur dames Ilse en Joyce ein groeët còmplement make veur de meneer woeë-op ze de vastelaovendj hóbbe geveerdj. 10 Jannewari 2009 laajdje 't veurke op en det brandje tot dinsdignacht non stop. Waat wore wae biej det wae de brandjblusser ómme nek haje...!!! (en aswoonsdig wore wae allemaal oetgeblustj) 't Jeugdprinsenpaar Xavier en Yvette mèt adjudante Bowen en Loïs bedanke wae veur eure inzèt in 't aafgeloupe seizoen. Gae woordj ein veurbieëldj veur ederein dae dees kans ouch oeëts kriegtj. Mèt uch waas 't echt 3 daag dikke pret. Raod van 11, alle comite's, de kapel, Kaolder Band en alle vastelaovesveerders, welke zich 't aafgeloupe jaor veur de vastelaovendj hóbbe ingezatte, hieël hertelik bedanktj. Ouch dit jaor raekene wae weer op uch want ouch dit jaor VEERE WAE VASTELAOVENDJ !

Moeërebuuk en Moeërinne, eine goje vastelaovendj!!!!

Vorst René

# De Kwakel

## PROKLAMATIE VAN JEUGDPRINS MAX EN JEUGDPRINSES GEERTJE

Ich, jeugdprins Max,  
11 jaor geleje gebore as 2° zoon van de 55e prins vanne Moerebuuk, Fer I ( van Linje) en aod jeugdprinses Angelique  
Didderen vanne Puinesjodders, twieëlingbroor van Ruud en groeëte broor van Eefje.

En ich, jeugdprinses Geertje,  
biena 12 jaor geleje gebore as 1° dochter van Eric van Thieu van Brunister en Adèle van Truus van Toeëme Pieër,  
twieëlingzus van Lieke.

### Laote uch bie de gratie vanne jeugdraod van 11 't volgendje wete:

1. Det wae jeugdprins en jeugdprinses wille zeen veur ederein,  
jónk, aod, erm, riek, groeët en klein.
2. Mèt ós buurte Kunnekoel en Hoverwei as vastelaovesoord, liktj 't accent dit jaor op Èll Noord.
3. Mèt adjudante Jasper en Nikki, weurdj 't deze vastelaovendj zeker dikke mikkie.
4. Wae lègge ózze DS efkes ane kantj, veur de vastelaovendj in 't Moeërelandj.
5. Ich, prinses Geertje, voetbal neet allein bie de D1 van RKESV, mer onnog mèt allein maedjes van de KNVB.
6. Ich, prins Max, voetbal meital mèt gepastj geweldj, bie de D2 van RKESV op 't middeveldj.
7. Ómdet ich allein aan voetballe nog neet genóg hób, bèn ich, prinses Geertje, onnog bie de volleyclub.
8. Al bèn ich, prins Max, bepaoldj neet vèt, toch mep ich mèt good waer bie  
de tennisclub meinig belke euver 't nèt.
9. Van muziek make weur se neet stóm, daoróm houw ich, prinses Geertje, bie de jeugdfanfaar oppe tróm.
10. En ich, prins Max, speel, bie dezelfde jeugdfanfaar, al ein jaor oppe sax.
11. Gein familie, mer allebei toch van eine mieërling, daoróm stèlle wae

de orde in van: **De halve twieëling**

En dit alles verklaore wae ónger ós motto:  
**Twieë Halve meuktj nog geine Hieële**

## Winnendj leedje Leedjesaovendj 2009-2010

Van: Steef Maessen/ Harm Maessen  
Melodie: Harm Maessen  
Arrangement: Fer Koolen

Titel: De Vastelaoveskriebel.

### Couplet 1:

In november.., den geit 't fieëst beginne  
Den kruuptj dae kriebel.., de moeërebuukskes binne!  
Dae kriebeltj ós allemaol klaar..  
Veur alweer ein ge-wel-djig vastelaovesjaor!

### Couplet 2:

's Maondjes den geit de optocht trèkke  
Den wiltj dea kriebel.., nog lang neet gaon vertrèkke!  
Dus loup de tied veural neet nao..  
Veur se 't wèts is de kriebel neet mieër dao!!

### Couplet 3

Op as-woonsdig.. de scepter is verbrandj  
Zelfs dae kriebel hèltj den geine standj  
De vastelaovendj is noe gedaon..  
Noewe kriebel óm nao volgendj jaor te gaon!


### Refrein


Kóm vanne kruk, dans door de zaal en wiebel!  
Maaktj uch mer klaar veur de vastelaoveskriebel!  
Det is de kriebel van plezeer,  
Det is de kriebel van gooj sfeer,  
Dae kriebel kumtj eder jaor weer!  
Kóm vanne kruk, spring door de locht en wiebel!  
Haodj uch mer vast veur de vastelaoveskriebel!  
Det is de kriebel van plezeer,  
Det is de kriebel van gooj sfeer  
Dae kriebel kumtj eder jaor weer!

### Refrein

### Refrein



### Refrein 2x





- Gestique
- P&F Springkussenverhuur
- Clerkx Eierhandel
- Eetcafé De Prairie
- Coolen Tuinderij BV
- ALAAF**

- Pand 17
- Bakkerij Thijs Koolen
- Fermate
- Dierenartsenpraktijk Ell
- Hans Nies Transport
- Landgoed Lemmenhof
- Moors Boomkwekerij
- Loonbedrijf Van Der Looy
- Eertwegh Tegelwerken
- Stals-Rijks planten en bloemen
- slagwerkmuziek ELCEE
- SPAR Leon Derksen
- Kunstschilder Peter Hermans
- Rabobank Ell eo
- TnT Audio en Licht verhuur
- Kledingatelier Nelly Heijkers
- Hondenkennel: De Kraanhoeve
- Garage Heemels
- Medische Pedicure Toos Mennen
- NaturELL Schoonheidssalon Ell



- Centrum voor Innerlijke Vrede
- Mindfulnessstrainingen Indachtig
- Willekens Toneeltechniek
- Bloemen- en plantenkwekerij Verhaag
- Schildersbedrijf Smeets Steyvers
- Timmerbedrijf-Houthandel W.Steuten
- Boeketten Don en Ilze vd Winkel
- Philipsen Fysio- en Sportfysiotherapie
- Gypsy Giants: Gypsy & Drum Horses
- Pedicure Bep van Oosterhout-Tobben
- MOOK motoronderdelen
- Fruitbedrijf Moors-Franssen
- Tank & Truck Cleaning Weert
- Winkelmolen Meubel- Timmerwerken
- Zuiderhuis Financiële Dienstverleners

**As se de ker trèkst, geis se vroet.**

- Equijoy
- Logopediepraktijk Eva Strous
- F. Vries Transport
- Geleuken Infra B.V.
- De Bachelorclub
- Linders Kwekerijen BV
- Slagerij Ruud en Marleen Heijkers
- Profmarkt.nl
- Elltaria
- De Schoenenhal
- Brennand Computerservice
- Truck Color Design
- Fruitbedrijf Koppen-Moors
- Custers Taaladviezen
- Staalbouw Derckx Weert BV
- Scissors & Co
- Schoonheidssalon Jeanne

